

**Bosna i Hercegovina**  
**FEDERACIJA BOSNE I HERCEGOVINE**  
**FEDERALNO TUŽITELJSTVO**  
**FEDERACIJE BOSNE I HERCEGOVINE**  
**SARAJEVO**  
**Broj: A-234/07**  
**Sarajevo, 22.06.2007. godine**

**KANTONALNIM TUŽILAŠTVIMA OD 1 DO 10**  
**n/r glavnih kantonalnih tužilaca**

*Polazeći od toga da je članom 3 Zakona o Federalnom tužilaštvu Federacije Bosne i Hercegovine propisano da Federalno tužilaštvo FBiH štiti ostvarivanje ljudskih prava i građanskih sloboda garantovanih ustavima Bosne i Hercegovine,*

*Imajući u vidu da je odredbom člana II stav 1 do 3 Ustava Bosne i Hercegovine utvrđeno da će Bosna i Hercegovina i oba entiteta osigurati najviši nivo međunarodno priznatih ljudskih prava i osnovnih sloboda i to na način da će se prava i slobode predviđeni u Evropskoj konvenciji za zaštitu ljudskih prava i osnovnih sloboda i u njenim protokolima direktno primjenjivati i to tako da će ovi akti imati prioritet nad svim ostalim zakonima,*

*Navodeći da prema pomenutoj ustavnoj odredbi sva lica na teritoriji Bosne i Hercegovine uživaju ljudska prava i slobode iz Evropske konvencije za zaštitu ljudskih prava i osnovnih sloboda pa i pravo da ne budu podvrgnuta mučenju, nečovječnom ili ponižavajućem tretmanu ili kazni (član 3),*

*Prihvatajući saznanja OSCE-a, stečena tokom praćenja provođenja istražnih radnji, koja ukazuju, i pored postojanja osnova sumnje da su osumnjičeni bili izloženi zlostavljanju od strane ovlaštenih službenih lica, na izostanak aktivnosti tužilaštava u smislu ne preduzimanja mjera i radnji propisanih zakonom,*

*Shvatajući da takva postupanja tužilaštava i pasivnost u preduzimanju zakonom propisanih mjera, mogu dovesti do odgovornosti Bosne i Hercegovine pred Evropskim sudom za ljudska prava zbog kršenja člana 3 Evropske konvencije za zaštitu ljudskih prava i osnovnih sloboda,*

**Glavni federalni tužilac,**

*u skladu sa ovlašćenjima iz člana 3 i 20 stav 1 Zakona o Federalnom tužilaštvu Federacije Bosne i Hercegovine, donosi*

**O B A V E Z N O U P U T S T V O**

*Uvažavajući obavezu Bosne i Hercegovine kao države da jamči svim osobama pod svojom jurisdikcijom prava i slobode utvrđene Evropskom*

*konvencijom o zaštiti ljudskih prava i osnovnih sloboda, konstatuje se da ta obaveza nameće proceduralnu obavezu pokretanja istrage u slučaju svakog potencijalnog kršenja člana 3 Evropske konvencije o zaštiti ljudskih prava i osnovnih sloboda, odnosno povrede prava lica da ne budu podvrgnuta mučenju, nečovječnom ili ponižavajućem tretmanu.*

*S tim u vezi, obaveza je kantonalnih tužilaštava da u slučaju saznanja da su osumnjičena lica ili druga lica bila izložena zlostavljanju, nečovječnom postupanju, mučenju ili ponižavajućem tretmanu od strane ovlaštenih službenih lica u organima unutrašnjih poslova ili drugih agencija za sprovođenje zakona, te da u tom smislu dobiju osnovane ili opravdane tvrdnje koje bi predstavljale osnove sumnje da je izvršeno krivično djelo iznuđivanje iskaza iz člana 181 KZ-a FBiH ili krivično djelo zlostavljanje u obavljanju službe iz člana 182 KZ-a FBiH, dužna su narediti sprovođenje istrage protiv ovlaštene službene osobe/osoba u cilju utvrđivanja postojanja navedenih krivičnih djela. Naređena istraga mora se provesti na brz i efikasan, temeljit i nezavistan način uz poštivanje svih zakonskih obaveza, te rezultirati, u slučaju utvrđivanja osnovane sumnje, podizanjem optužnice protiv ovlaštene službene osobe.<sup>1</sup>*

*S obzirom da neka kantonalna tužilaštva imaju primljene prijave oštećenih građana protiv ovlaštenih službenih lica zbog pomenutih krivičnih djela dužna su te prijave ili već naređene istrage riješiti odnosno završiti u što kraćem vremenskom periodu uz poštivanje naznačenih principa efikasnosti, temeljitosti i nezavisnosti.*

*Potreba kontinuirane, korektne i konstruktivne saradnje sa organima unutrašnjih poslova i drugim agencijama za sprovođenje zakona u borbi protiv kriminala nameće svim tužilaštvima obavezu stalnog unapređenja međusobne saradnje u cilju postizanja što boljih rezultata u borbi protiv svih oblika kriminala. Kako se obaveze poštivanja ljudskih prava i osnovnih sloboda utvrđenih Evropskom konvencijom o zaštiti ljudskih prava i osnovnih sloboda odnose i na organe unutrašnjih poslova i druge agencije za sprovođenje zakona, neophodno je da glavni kantonalni tužioci u procesu saradnje sa navedenim organima održe sastanke sa rukovodnim osobljem u tim organima u cilju pojašnjavanja obaveza u pogledu poštivanja svih prava i sloboda, a naročito prava lica da ne budu podvrgnuta mučenju, nečovječnom ili ponižavajućem tretmanu koje je utvrđeno članom 3 Evropske konvencije o zaštiti ljudskih prava i osnovnih sloboda.*

**GLAVNI FEDERALNI TUŽILAC**

**Zdravko Knežević**

---

<sup>1</sup> U cilju boljeg razumijevanja u prilogu se dostavljaju relevantni slučajevi i praksa Evropskog suda za ljudska prava.